

Na osnovu člana 30. stav (1) tačka s) i stav (2) i člana 48. Zakona o plaćama i naknadama u institucijama Bosne i Hercegovine ("Službeni glasnik BiH", br. 50/08 i 35/09) i člana 17. Zakona o Vijeća ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 91. sjednici, održanoj 17. juna 2009. godine, donijelo je

ODLUKU

O NAČINU I POSTUPKU OSTVARIVANJA PRAVA NA NAKNADU ZA VRIJEME PRODUŽENOG RADNOPRAVNOG STATUSA IZABRANIH OSOBA I IMENOVANIH SLUŽBENIKA U INSTITUCIJAMA BOSNE I HERCEGOVINE

Član 1. (Predmet Odluke)

Ovom Odlukom uređuje se način i postupak ostvarivanja prava izabranih osoba i imenovanih službenika u institucijama Bosne i Hercegovine (u daljnjem tekstu: izabrani službenici i nositelji dužnosti) na naknadu za vrijeme produženog radnog statusa, u skladu sa članom 48. Zakona o platama i naknadama u institucijama Bosne i Hercegovine.

Član 2. (Visina naknade)

Izabrani službenici i nositelji dužnosti, nakon prestanka javne dužnosti, imaju pravo na naknadu za produženje radnog statusa u visini osnovne plaće s dodatkom za minuli rad i poreze i doprinose u skladu sa propisima koji regulišu ovu oblast.

Član 3. (Ograničenje prava na naknadu)

- (1) Izabrani službenici i nositelji dužnosti, nakon prestanka javne dužnosti, imaju pravo na naknadu za produženje radnog statusa ukoliko nisu stekli uslove za odlazak u penziju odnosno radni status kod drugog subjekta.
- (2) Izabrani službenici i nositelji dužnosti pravo na naknadu za vrijeme produženog radnog statusa mogu koristiti najduže godinu dana počevši od dana prestanka javne dužnosti.

Član 4. (Obračun i isplata naknade)

Obračun i isplata naknade za vrijeme produženog radnog statusa izabranih službenika i nositelja dužnosti u institucijama Bosne i Hercegovine vrši se uz mjesečni obračun i isplatu plaća i naknada zaposlenih u institucijama Bosne i Hercegovine na osnovu rješenja o produženom radnom statusu izdatom od strane rukovodioca institucije.

Član 5. (Institucije odgovorne za provođenje Odluke)

Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

Član 6. (Stupanje na snagu)

Odluka stupa na snagu narednog dana od dana objavljivanja u "Službenom glasniku BiH".

VM broj 172/09
17. juna 2009. godine
Sarajevo

Predsjedavajući
Vijeća ministara BiH
Dr. Nikola Špirić, s. r.
